

### **Кондак 1**

Взбранной Воеводе, богообрадованной Приснодеве Богородице, посетившей гору Афонскую явлением чудотворныя иконы Своя и многия милости Ею дарующей роду христианскому, похвальное возглашаем ныне пение: Ты же, о Богомати, яко имущая державу непобедимую и матернее о нас попечение, предвари на помощь к нам и от всяких бед избави зовущих Ти:

Радуйся, Помощнице наша, Троеручною иконою Твоею нам помогающая.

### **Икос 1**

Ангел земный и человек небесный преподобный Иоанн Дамаскин от любви теплыя к Тебе, Богомати Владычице, икону Твою святую соорудити потщася и сию в келлии своей благоговеино поставив, пред нею сие Тебе в молитвах усердных гааголаше:

Радуйся, радость вечную, Спасителя миру рождающая;

Радуйся, всегубительнаго ада силу Рождеством Твоим поправшая.

Радуйся, пророческих глаголов исполнение принесшая;

Радуйся, Адама и Евы преступление загладившая.

Радуйся, Единого от Троицы на руку Твоею нетрудно носившая;

Радуйся, огонь Божества неопально во чреве Твоем вместившая.

Радуйся, Помощнице наша, Троеручною иконою Твоею нам помогающая.

### **Кондак 2**

Видя преподобный Иоанн Дамаскин десницу свою, много писавшую в защиту чести и поклонения святых икон, по навету царя иконоборца немилостиво отсеченную, испроси ю от невернаго мучителя, и приложив к усеченному ея составу, пред честною иконою Твоею, Пречистая Дево, слезно моляшеся Ти, о еже исцелитися ей. Ты же, всеблагая и всемогущая рода нашего Заступнице, молитву его скоро услышала еси, и во сне представши ему, исцеление усеченной руке его даровала еси, да благодарственно поет Богу: Аллилуия.

### **Икос 2**

Разум человеческий не может постигнути силу исцелений благодатных, иконою Твоею, о Богомати, чудесно являемых, не может изъяснити и чудо велие, како отсеченная десница Преподобнаго во едину ночь цела и здрава обретесе, на ней же токмо червленый знак бывшия язвы оставлен бысть Врачебницею благою, слышащею от нас сия похвалы:

Радуйся, скоро являющаяся Утешительнице скорбящих душ;

Радуйся, радостотворная Посетительнице болезнующих сердец.

Радуйся, безнадежных страдальцев надеждою исцеления ободряющая;

Радуйся, врачами оставленных болезнующих на Своей руке приемлющая.

Радуйся, усеченную десницу Божия избранника целу и здраву вышеестественно соделавшая;

Радуйся, яко ничтоже невозможно Тебе, милосердая Предстательнице, нам всегда заступление показующая.

Радуйся, Помощнице наша, Троеручною иконою Твоею нам помогающая.

### **Кондак 3**

Силу десницы Всевышняго в исцелении усеченныя десницы своя познав богоглаголивый Иоанн, песньми красными воспе Тя, Владычице всеблагая, и подобие усеченныя руки своя приложи к целебному Твоему образу ради памяти всегдашня о великом чудеси. Тем ныне видима есть и именуется сия святая икона Твоя Троеручица, тремя руками, на ней описанными, проявляющая таинство Святыя Троицы, чудесы же, от нея бывающими, всех приводящая хвалебно взывати ко Господу: Аллилуия.

### **Икос 3**

Имеяй велику ревность по Бозе, духоносный песнописец Святыя Церкви и Божественный славитель ея, сладкий преподобный Иоанн, хвалебными пении до конца жизни своя прославляше Твою к нему дивную милость, Богородительнице, в память же бывшего чудесе плат, имже усеченная рука его обвернута бе, на главе своей ношаше, икону же Твою многоцелебную, яко наследие богатое, святей Лавре преподобнаго Саввы Освященнаго по себе остави, да вси вернии зовут к изображенной на ней Целительнице душ и телес сице:

Радуйся, врагов святыя православныя веры крепкая Поборнице;

Радуйся, проповедников Евангельскаго учения Покровительнице.

Радуйся, благочестивых христиан защите и похвало;

Радуйся, боголюбивых иноков утешение.

Радуйся, ведущим брань противу мира, плоти и диавола добрая Споспешнице;

Радуйся, ревнующим о целомудрии и чистоте изрядная Пособнице.

Радуйся, Помощнице наша, Троеручною иконою Твоею нам помогающая.

### **Кондак 4**

Буря недоумения смущает ми ум, како возмогу недостойными усты воспети славу Твою, Пречистая Дево, юже во иконе Твоей святей явила еси, даровавши ю нам в помощь и защиту от враг видимых и невидимых. Темже, величая неисчетныя милости Твоя к роду христианскому, исповедую чудеса Твоя и смиренномудренно пою Вседержителю: Аллилуия.

### **Икос 4**

Слышавше иноцы святыя Лавры Саввы Освященнаго о великих добродетелех пришедшаго в Лавру на поклонение первосвятителя сербскаго Саввы, по внушению Твоему, Богомати, дароваша ему на благословение святую икону Твою Троеручицу, юже он со благоговением, яко дар многоценен, в страну сербскую принесе, поучая паству свою звати Тебе:

Радуйся, от востока и до запада силу всемогущества

Христова иконою Твоею возвещающая;

Радуйся, болезни душевныя и телесныя иконою Твоею скоро врачующая.

Радуйся, Сербстей стране икону Твою в залог благоволения даровавшая;

Радуйся, чудесы Твоими Православие в ней крепко утвердившая.

Радуйся, Симеона Мироточиваго область благодатно посетившая;

Радуйся, Саввы первопрестольнаго паству матерним покровом Твоим приосенившая.

Радуйся, Помощнице наша, Троеручною иконою Твоею нам помогающая.

### **Кондак 5**

Боготечней звезде подобна явися икона Твоя,  
Богородительнице, по воли Твоей святей на ослиа поставленная и  
отпущенная из Сербии, ослиати никимже водиму, принесесея им на  
гору Афонскую ко вратом обители Хилендарския, юже яко дар  
небесный восприимше иноцы, поставиша в алтари соборныя церкви  
обители, зовуще во умилении глгобоцем благих Подателю Богу:  
Аллилуия.

### **Икос 5**

Видевше иноцы хилендарстии Твое к ним благоволение,  
Преблагословенная Дево, в чудеснем пришествии к ним святыя  
иконы Твоея Троеручицы явленное, с радостию и любовью ей  
покланяхуся, целующе и песненно возглашающе Ти благохваления  
сицевая:

Радуйся, Путеводительнице подвижников благочестия к  
горнему Сиону;

Радуйся, пустыннолюбивых иноков приводящая к небесному  
Иерусалиму.

Радуйся, безсловесное ослиа воли Твоей святей чудесно  
покорившая;

Радуйся, на ослии икону Твою благодатную от Сербии на Афон  
дивно принесшая.

Радуйся, пустыню Афона благоуханием святыни исполнившая;

Радуйся, Хилендарскую обитель благоволением Твоим  
облагодатствовавшая.

Радуйся, Помощнице наша, Троеручною иконою Твоею нам  
помогающая.

### **Кондак 6**

Проповедует обитель Хилендарская на Афоне богатство  
милостей и щедрот Твоих, Богородице Дево, и светло красуется  
имущи святую икону Твою Троеручицу во игумена себе, ибо  
таковая бысть воля Твоя, еже пребывати иконе Твоей тамо на  
игуменстем месте во храме Божиим и в душах братии, от Тебе  
единыя благословение на всякое послушание приемлющей и  
хвалебно зовущей тако благоволившему о них Творцу: Аллилуия.

### **Икос 6**

Возвестила еси волю Твою, Богомати, иноком хилендарским,

разногласием во избрании игумена смущенным, чудесно поставивши святую икону Твою на игуменском месте во храме Божиим и открывши единому от них в видении, яко Сама Ты хочещи пребывать настоятельствующею в обители их иконою Твоею честною, да и прочее не избирают себе игумена. Они же во умилении душ и сердец обрадовании возопиша к Тебе:

Радуйся, иноков благоподвизающихся известная и всемогущая Покровительнице;

Радуйся, к Сыну Твоему и Богу теплая о них Предстательнице.

Радуйся, жезл игуменский в Хилendarстей обители невидимо приемшая;

Радуйся, обитель сию доселе целу и благоустроену сохраняющая.

Радуйся, страхом и благоговением сердца братии, благословение от иконы Твоея приемлющих, исполняющая;

Радуйся, неблагоговейных и дерзостных грозно наказующая.

Радуйся, Помощнице наша, Трoеручною иконою Твоею нам помогающая.

### **Кондак 7**

Хотящи соделати не токмо Афон, но и вся иныя страны Православныя причастными благодати великих чудес, иконою Твоею Трoеручною изливаемых и бываемых, Пречистая Владычице, тую во всех градах, весех, церквах и обителях иноческих распространила и дивными чудесы прославила еси. Темже вся верная чада святую икону Твою Трoеручицу любовью чествуют и на ней вкупе с Тобою изображенному Христу усердно зовут: Аллилуия.

### **Икос 7**

Дивно являеши, Преблагословенная Дево, милости веерным людям и святою иконою Твоею Трoеручицею преславная чудеса содеваеши силою благодати Христовы: слепыя просвещаеши, разслабленныя укрепляеши, недужныя врачуеши и всем прибегающим к целебному Твоему образу скорую помощь Твою присно являеши, подвизающи звати к Тебе:

Радуйся, Святую гору Афонскую в жребий Себе избравшая;

Радуйся, и вся страны Православныя покровом милости Твоея осенившая.

Радуйся, Хилendarския обители Настоятельнице неизменная;

Радуйся, многих мест и пустынь сокровище исцелений неоскудное.

Радуйся, на Афоне, в России, Сербии и иных странах иконою Твоею преславно чудодействующая;

Радуйся, любящая и чтущая Тя от всяких бед избавляющая.

Радуйся, Помощнице наша, Трoеручною иконою Твоею нам помогающая.

### **Кондак 8**

Странно есть видети иноки Хилendarския, к иконе Твоей яко к игумену приходящия и от Нея благословения на послушания своя приемлющия. Но, о Всеблагая, якоже приемлещи их милостивно и благословляеши, тако и нас, недостойных, не лиши матерняго

Твоего милосердия и попечения, прими благоутробно молитвы наша, пред святою иконою Твоею возносимыя, осени нас благословением Твоим благодатным, избави от всяких бед и скорбей и научи богоугодно Пети Троидиному Богу: Аллилуия.

### **Икос 8**

Весь мир преисполнен, яко звездами богосветлыми, чудотворными иконами Твоими, Богородице Дево, в нихже яко денница лучезарная, икона Твоя Троеручица предивными чудесы благодатно сияет и согревает хладная сердца наша знаменьями Твоего к нам Милостиваго призрения. Сего ради чествуем пречистаго лика Твоего святое изображение и Тебе пред ним вопием:

Радуйся, богообрадованная и пренепорочная Приснодево;

Радуйся, едина чистая и благословенная в женах.

Радуйся, нетленная и неискусобрачная Агнца и Пастыря Мати;

Радуйся, прекрасная и светоносная палато святых Святейшаго Слова.

Радуйся, крине белоснежный и благовонный девства и чистоты;

Радуйся, Царице и Владычице Небесе и земли.

Радуйся, Помощнице наша, Троеручною иконою Твоею нам помогающая.

### **Кондак 9**

Всяк возраст верных благопользуется Твоим матерним попечением, всеблагая Владычице. Младенцы милосердно окормляеши, отроки невидимо руководиуеши, мужи во благочестии утверждаеши, старцы в немощех укрепляеши, всем же вся благая и душеполезная даруеши всесильным ходатайством Твоим у Престола Пресвятыя Троицы, Ейже благодарно поем: Аллилуия.

### **Икос 9**

Ветии человечестии не могут достойно восхвалити без сравнения Тя, Богородице, честнейшую Херувим и славнейшую Серафим, рождшую Единого от Троицы Христа Жизнодавца. Мы же, любовь к Тебе воодушевлении, смиренномудренно дерзаем приносить Тебе песни таковыя:

Радуйся, державная Заступнице рода христианскаго;

Радуйся, Благосердая Мати всех скорбящих и обремененных.

Радуйся, кротким сиянием Твоим мрак грехов и страстей наших разгоняющая;

Радуйся, на стези покаяния нас премудро наставляющая.

Радуйся, в грозный час смерти всем нам крепкая Защитнице;

Радуйся, добраго ответа нам пред Судиею праведным усердная Ходатаице.

Радуйся, Помощнице наша, Троеручною иконою Твоею нам помогающая.

### **Кондак 10**

Спасения залог даровася нам святая и всечестная икона Твоя, Богородительнице Дево, ибо, якоже древле прорекла еси

Божественному евангелисту Луце, с нею и донныне сила Твоя  
благодатно пребывает, чудеса преславными веру в нас  
утверждает, недужныя безмездно врачует и на путь спасения души  
наша приводит, до зовем прославльшему имя Твое во вселенней  
Царю Небесе и земли: Аллилуия.

#### **Икос 10**

Стена еси девам и ликом иноческим, Богоневестная Дево,  
всем усердно к Тебе прибегающим, икону же Твою святую  
благоговейно чествующим, ибо сию дарова нам благих податель  
Господь в помощь и врачество недугом душевным и телексным и  
сим внушает пети Тебе:

Радуйся, добрая Младопитательнице дев и безматерних  
сирот;

Радуйся, иноков и инокинь благоскорбящих Предводительнице  
к градом небесным.

Радуйся, в узах и темнице сидящих посещающая утешением  
благодатным;

Радуйся, благословение домов и супружеств благочестивых.

Радуйся, юных Наставнице целомудрия и воздержания;

Радуйся, старцев приводящая к благому житию и мирней  
кончине.

Радуйся, Помощнице наша, Троеручною иконою Твоею нам  
помогающая.

#### **Кондак 11**

Пение молебное наше, Тебе пред пречистым образом Твоим с  
верою и любовью возносимое, милостивно услыши, Госпоже  
всемиловитая, и сохрани нас от тлетворных учений неверия и  
суеверия, ими же наветуется в нас святоотеческая православная  
вера, избави нас от лукавых совращений, сохрани нас и  
Отечество наше от всяких крамол и от всяких нестроений и злых  
развращений, врагами веры и Отечества нашего воздвигаемых, и  
сподоби в любви и единомыслии, со всеми верными чады Святыя  
Христовы Церкви богоприятно пети Создателю нашему: Аллилуия.

#### **Икос 11**

Светоприемлемая свеча икона Твоя святая, Богородице Дево,  
мир весь сиянием чудес просвещает, сердца же наша любовью  
воспламеняет к Тебе, пречистой и преблагословенней Мастер  
сладчайшего Господа нашего Иисуса Христа даровавшего нам Тебе  
в покров и защиту противу полчищ сатанинских, иже боятся и  
трепещут самага имени Твоего, ведающе силу Твою, юже величаем  
и Тебе зовем:

Радуйся, враги наша видимыя и невидимыя премудро  
запинающая;

Радуйся, хулителей святыя православныя веры невидимо  
карающая.

Радуйся, духов злобы от нас державно отгоняющая;

Радуйся, преобладати им над нами не попускающая.

Радуйся, любовь к Богу и ближним нас воодушевляющая;

Радуйся, яко благая прошения наша скоро исполняющая.

Радуйся, Помощнице наша, Троеручною иконою Твоею нам  
помогающая.

### **Кондак 12**

Благодать свыше даровася святей иконе Твоей Троеручице, Владычице преблагая: скорбящая утешати, болящая исцеляти, слепыя просвещати, расслабленныя укрепляти, верныя во благочестии утверждати, неверныя к познанию истины приводити, знаменьями и чудесы от нея бываемыи, яже воистинну превосходят разумение человеческое и токмо верою постигаются, приводяща верныя души к немолчному славословию Творца богокрасною песнию: Аллилуия.

### **Икос 12**

Поем чудеса Твоя, благодатная Богородительнице, не таим щедрот Твоих, исповедуем благодеяния Твоя, прославляем неисчетную милость Твою к роду христианскому, уже ведут все концы земли, ибо от востока до запада хваляно имя Твое святое, благословляемое от всех родов и в молитвах призываемое во всех странах. Тебе убо, сие прославленной и превознесенной Сыном Твоим и Богом, и мы хвалебно вопием:

Радуйся, тихое пристанище плавающих в пучине житейского моря;

Радуйся, тревожащее страстей умиротворяющая Своим сердобольным участием.

Радуйся, во уныние и отчаяние впадших подъемлющая надежду спасения;

Радуйся, сомнениями в вере колеблющихся вразумляющая знаменьями и чудесы.

Радуйся, в обителях иноческих подвижающимся богоугодно Подательнице блаженного упокоения;

Радуйся, и в мире благочестно живущия не лишаящая Твоего заступления.

Радуйся, Помощнице наша, Троеручною иконою Твоею нам помогающая.

### **Кондак 13**

О всепетая Мати сладчайшего Искупителя нашего Господа Иисуса Христа! Вонми гласу молебному, Тебе пред святою иконою Твоею нами смиренно возносимому, и матернею молитвою Твоею к рождавшемуся от Тебе, святых Святейшему Слову, от всякия избави напасти и вечныя муки всех имя Твое молитвенно призывающих и о Тебе благодарно зовущих Богу: Аллилуия.

**Этот кондак читается трижды, затем икос 1-й и кондак 1-й**

### **Молитва ко Пресвятей Богородице**

Пресвятая и Преподобная Дево Богородице Марие! Припадаем и поклоняемся Ти пред святою Троеручною иконою Твоею, воспоминающе преславное чудо Твое исцелением усеченныя десницы преподобнаго Иоанна Дамаскина от иконы сея явленное, егоже знамение доныне видимо есть на ней во образе третия руки, к изображению Твоему приложенныя. Молимся Ти и просим Тя, всеблагую и всещедрую рода нашего Заступницу: услыши нас, молящих Ти ся, и якоже блаженнаго Иоанна, в скорби и болезни к Тебе возопившаго, услышала еси, тако и нас не презри, скорбящих и болезнующих ранами страстей многообразных и к



Тебе от души сокрушенныя и смиренныя усердно прибегающих. Ты зриши, Госпоже всемилостивая, немощи наша, озлобление наше, нужду, потребу нашу в Твоей помощи и заступлении, яко отвсюду врагами окружени есмы и несть помогающего, ниже заступающего, аще не Ты умилосердишися о нас, Владычице. Ей, молим Ти ся, вонми гласу болезненному нашему и помози нам святоотеческую православную веру до конца дней наших непорочно сохранить, во всех заповедех Господних неуклонно ходити, покаяние истинное о гресех наших всегда Богу приносить и сподобитися мирныя христианския кончины и добраго ответа на Страшнем суде Сына Твоего и Бога нашего, Егоже умоли за нас матернею молитвою Твоею, да не осудит нас по беззаконию нашим, но да помилует нас по велицей и неизреченней милости Своей. О Всеблагая! Услыши нас и не лиши нас помощи Твоея державныя, да, Тобою спасение получивше, воспоем и прославим Тя на земли живых и рождагося от Тебе Искупителя нашего Господа Иисуса Христа, Емуже подобает слава и держава, честь и поклонение, купно со Отцем и Святым Духом всегда, ныне и присно и во веки веков. Аминь.

**Тропарь Пресвятой Богородице перед Ея иконой, именуемой «Троеручица»**

**Тропарь, глас 4:**

Днесь всемирная радость возсия нам велия, даровася святей горе Афонстей цельбоносная Твоя, Владычице Богородице, икона, со изображением тричисленно и нераздельно пречистых рук Твоих, в прославление Святыя Троицы: созываеши бо верных и молящихся Тебе о сем познати, яко двема имаши Сына и Господа держати, третью же яви на прибежище и покров чтущим Тя от всяких напастей и бед избавляти, да вси, притекающи к Тебе верою, приемлют от всех зол освобождение, от врагов защищение. Сего ради и мы вкупе со Афоном вопием: радуйся, Благодатная, Господь с Тобою.

**Ин тропарь, глас 4:**

Яко звезда светозаряющая, из Сербии на Афон чудесно прииде всечестная икона Твоя Троеручица, юже обитель Хиландарская благоговейно восприемши, яко Божественный дар свыше, прославляет Тя, Владычицу, и умильно вопиет: не остави милость Твою от нас, но пребуди с нами во веки.

**Тропарь на молебне, глас 4:**

Днесь светло красуется славнейший град Москва, имеющи в себе, о Всемилостивейшая, всея твари Честнейшая, Заступнице наша Дево Богородице, честный образ Твой, имже подсолнечныя концы земли удивляеши и мир мирови даруеши; во образ бо Святыя Троицы являеши трие руке: двема убо Сына Своего, Христа Бога нашего, носиши, третиею же от напастей и бед верно к Тебе прибегающих избавляеши, и от потопления изымаеши, и всем полезная даруеши, и преподобному Михаилу Малеонскую гору показа, и всех всегда милуеши; честною ризою Своею покрываеши жительство сие и вся грады и страны наша, да зовем Ти: радуйся, Обрадованная.



### **Кондак, глас 8:**

Днесь веселое наста ныне Твое торжество, Богомати Пречистая, вси вернии исполнишася радости и веселия, яко сподобльшеся изрядно воспети предивное явление честнаго образа Твоего и Рождшагося из Тебе Младенца, истинна же Бога, Егоже двема рукама объемлеши, и третьию от напастей и бед нас изымаеши и избавлявши от всех зол и обстояний.

### **Ин кондак, глас 3:**

Дева днесь благоволение к нам являет, гора же Афон благодарение Ей приносит, ангели и иноцы славословят, Треручица из Сербии чудесно путешествует: нас бо ради прииде и вселися во святую обитель Хиландарскую.

### **Кондак на молебне, глас 8:**

Взбранной Воеводе победительная, яко избавльшеся от злых, благодарственная восписуем Ти, раби Твои, Богородице, но, яко имущая державу непобедимую, от всяких нас бед свободи, да зовем Ти: радуйся, Невесто Неневестная.

### **Величание**

Величаем Тя, Пренепорочная Дево, и чтим чудеса образа святаго Твоего, трех пречистых рук Твоих явление в славу Божества, в Троице Бога нашего.

### **Ино величание**

Величаем Тя, Пресвятая Дево, и чтим тричисленное изображение пречистых рук Твоих, Ты бо двема Сына и Господа держиши, третьию от напастей и бед нас избавляеши.

[Празднование 28 июня/11 июля и 12/25 июля](#)